

Ni Pangulong Dieter F. Uchtdorf

Ika-duhang Manuglaygay sa Unang
Panguluhan



Ang Tanan Matawhay

Kon ginahunahuna ko ang parte sa pionero nga palanublion, isa sa labing makatalandog nga bagay nga nagasulod gid sa akon hunahuna amo ang himno nga "Come, Come Ye Saints" (*Hymns*, num. 30). Yadtong mga nagbatas sang malawig nga pagpanglakaton pakadto sa Nalupyakan sang Salt Lake masami nga naga-kanta sini nga himno sa tion sang ila pagpanglakaton.

Nakasayod gid ako nga indi tanan nangin maayo para sa sini nga mga Santos. Nag-antos sila sang mga balatian, init, kakapoy, katugnaw, kahadlok, gutom, kasakit, pang-pangduhadua kag bisan pa gani kamatayon.

Apang bisan pa nga yara ang tagsa nga rason nga magsinggit "Ang tanan indi maayo," napasangkad nila ang ila panglantaw nga aton ginadayaw sa karon. Nagtulok sila sa unhan sang ila mga kabudlayan padulong sa wala'y kapatusan nga mga bugay. Mapinasalamaton sila sa ila mga sirkumstansya. Bisan pa nga makit-an ang kabaliskaran, nagkalanta sila nga may kaisog sa ila mga kalag nga "Ang tanan matawhay!"

Ang aton pagdayaw para sa mga pionero mangin wala'y kahulungan kon indi ini magdulot sang pagbinag-binag sa aton bahin. Ihambal ko ang pila sang ila mga kinaugali nga nagainspirar sa akon kon akon ginapanumdum sing madalom ang ila pagsakripisyoy kag pangako.

Kaluoy

Ang mga pionero nag-atipan sang tagsatagsa sa ila wala'y sapayan sang ila estado sa sosyedad, ekonomiya, ukon

politika. Bisan nga nagpahinay pa ini sang ila pag-uswag, nagtuga sang sablag, ukon nagakinahanglan sang personal nga pagsakripisyoy kag pagpangabudlay, ginbuligan nila ang tagsa-tagsa.

Sa aton kalibutan nga puno sang mga lalab-uton kag grupo, ang mga tinutuyo sang isa ka indibidwal ukon grupo mahimo nga pasulabihon sangsa pag-atipan sang iban ukon pagpabakod sang ginharian sang Dios. Sa karon nga sosyedad, ang paglab-ot sang pila ka mga lalab-uton nga ideya mahimo nga mangin sulukdan sang aton bili.

Ang pagplastar kag paglab-ot sang mga lalab-uton mangin isa ka matahum nga bagay. Apang kon ang kadalag-an sa paglab-ot sang mga lalab-uton nagaabot sa pihak sang pagpatumbaya, pagbale-wala, ukon pag-sakit sa iban, ang bili sinang kadalag-an magin tuman ka mahal.

Ang mga pionero nag-ulikid sadtong yara sa ila nga grupo, apang ila man ginahunahuna ang mga nagasunod sa ila, nga nagpananom para sa mga nagasunod sa karusa.

Ila nahibaloan ang kabaskog sang pamilya kag kaabyanan. Kag bangud nagasandig sila sa kada isa, sila nangin mabakod. Ang kaabyanan nangin kapamilya.

Ang mga pionero nagserbe nga maayo nga pahanendum kon ngaa kinahanglan naton likawan ang pagsulay agud ipahilayo ang aton kaugalingon kag, sa baylo, magtinguha sa pagbulig sa kada isa kag maluoy kag magpalangga sa kada isa.

Buluhaton

“Kari, kari, kamo mga Santos, indi magkahadlok sa pagpangabudlay.”

Ining mga tinaga nangin ambahanon sang ginakapoy nga mga nagapanglakaton. Mabudlay panumdumon kon paano nagpangabudlay ining maisog nga mga kalag. Ang paglakat ang isa sa pinakamahapos nga ila ginhimo. Tanan sila kinahanglan nga magbinuligay sa pagtigana sang pagkaon, pagkaayo sang mga karusa, pag-atipan sang kasapatan, pag-alagad sa nagamasakit kag nagaluya, pagpangita kag pagsag-ob sang tubig, kag pag-amlig sang ila kaugalingon gikan sa makatalagam nga mga elemento kag madamo nga mga peligro sa kamingawan.

Nagbugtaw sila sa tagsa ka aga nga may maathag nga mga katuyuan kag lalab-uton nga nahangpan sang tanan : ang mag-alagad sa Dios kag sa ila isigkatawo kag makalab-ot sa Nalupyakan sang Salt Lake. Sa tagsa ka adlaw yadtong mga katuyuan kag mga lalab-uton maathag sa ila; nakahibalo sila kon ano ang kinahanglan nila himuong kag nga ang pag-uswag sa tagsa ka adlaw importante.

Sa aton panahon—kon san-o nga ang kalabanan sang aton ginahandum madali lang kaayo naton lab-uton—makasululay ang magpatumbaya ukon magpadaug kon ang dalan sa unhan dawsa medyo maundag ukon ang banglid daw ka tuman kataas sa atubang naton. Sa sina nga tinion, mahimo nga mainspirar kita sa paghunahuna sadtong mga lalaki kag babayi, kag kabataan nga wala nagtugot nga ang balatian, kabudlayan, kasakit , kag bisan pa ang kamatayon nga mag-upang sa ila ginpili nga dalan.

Ang mga pionero nakatuon nga ang paghimo sang mabudlay nga mga butang nagpadalom kag nagpabaskog sang lawas, pamensaron, kag espiritu; napasangkad sang ila panghangop sa ila diosnon nga kinaugali; kag nagpadugang sang ila kaluoy para sa iban. Ini nga pangginawi nagpabakod sang ila mga kalag kag nangin bugay sa ila sa malawig nga panahon pagkatapos sang ila pagpanglakaton patabok sa mga kapatagan kag kabukiran.

Pagkapositibo

Samtang nagkanta ang mga pionero , ginpabutyag nila ang ikatlo nga leksyon: “Upod ang kalipay magpadayon.”

Isa ini sa pinakadako nga kabaliskaran sa aton panahon nga kita ginbugayan sang sobra kaayo apang masinulub-on kita kaayo. Ang katahum sang pag-uswag

kag teknolohiya nagadaug sa aton kag nagahatag sa aton sang seguridad, kalingawan, gilayon nga kalipayan, kag kahapusan. Apang sa palibot naton makita naton ang dako kaayo nga kasubo.

Ang mga pionero, nga nagsakripisyong tuman, nagpadayon sa kawad-on kag kagutom sa bisan sinang pinakakinahanglanon gid agud mabuhi. Ila nahangpan nga ang kalipayan wala nagaabot bilang resulta sang suwerte ukon aksidente. Piho gid nga wala ini nagaabot tungod natuman ang tanan naton nga mga ginhandum. Ang kalipay wala nagaabot gikan sa panggwa nga mga sirkumstansya. Nagahalin ini sa sulod [naton]—bisan ano pa ang nagakatabo sa palibot naton.

Ang mga pionero nakahibalo sina, kag sa sina nga espiritu sila nakasalapo sang kalipay sa tagsa ka sirkumstansya kag sa tagsa ka pagtilaw—bisan sa mga pagtilaw nga naglab-ot gid sa kaidadalman sa ila mismo nga mga kalag.

Mga Pagtilaw

Kon kaisa nagahanduraw kita kon ano ang ginbatas sang mga pionero kag nga may kasulhay nagasiling, “Salamat kay wala ako nagkabuhi sa amo nga panahon.” Apang ginapamensar ko kon yadtong maisog nga mga pionero, kon nakita nila kita sa karon, ayhan indi man magpahayag sing amo nga kabalaka.

Bisan pa nga ang mga panahon kag mga sirkumstansya naglain, ang mga prinsipyong pag-atubang sang mga pagtilaw kag madinalag-on nga pagpuyo bilang isa ka maatipanong kag mainuswagon nga komunidad sa idalom sang Dios wala naglain.

Gikan sa mga pionero aton matun-an ang magtuo kag magsalig sa Dios. Sarang naton matun-an ang magkaluoysa iban. Sarang naton matun-an nga ang magtrabaho kag kapisan nagabugay sa aton indi lamang sa temporal kundi subong man sa espirituhanon. Sarang naton matun-an nga ang kalipay yara para sa aton ano man ang aton sirkumstansya.

Ang pinakamaayo nga paagi nga sarang naton pasidungan kag ipakita ang aton kapasalamat sa mga pionero amo ang ihamtang sa aton mismo nga mga kabuhi ang pagkamatinanong sa mga kasuguan sang Dios, kaluoy kag pagpalangga sa aton isigkatawo, kag sang kapisan, pagkapositibo, kag kalipay nga ginpakita sing maayo sang mga pionero sa ila kaugalingon nga mga kabuhi.

Kon aton ini himuong, sarang naton dab-uton yadtong panahon, uyatan ang aton mga kamot sadtong halangdon nga mga pionero, kag idugang ang aton mga tingug sa ila samtang nagakanta upod sa ila: "Ang tanan matawhay! Ang tanan matawhay!"

PAGTUDLO GIKAN SA SINING MENSAHE

Mahimo ninyo sugdan paagi sa pagkanta sang "Come, Come, Ye Saints" (*Hymns*, num. 30) upod ang inyo ginabisitahan. Mahimo kamo magpaambit sang isa ka eksperiensya sang ikaw ukon isa mo ka kilala ang nagdapat sang mga prinsipyo sang kaluoy, pag-pangabudlay, ukon pagkapositibo. Kon ginapabatyag, mahimo ka magpanaksihon sang mga bugay nga nagaabot gikan sa pagpangabuhι sining mga prinsipyo kag saari ang inyo mga ginabisitahan nga sarang sila makabaton sang pareho man nga mga bugay.

LAMHARON

Pagtipig sang Rekord

Si Pangulong Uchtdorf nagakomparar sang aton panahon karon sa panahon sang mga pionero. Bisan wala ikaw nakatabok sa mga kapatagan, kaangay ka man sa mga pionero sangsa sa imo ginahunahuna! Sarang ka man makapakita sing kaluoy, kapisan, kag pag-kapositibo. Kag kaangay nga aton nahibaloan nga ang mga pionero nagpakita sining mga ugali bangod sang mga rekord nga ila gintipigan, ang imo mga kaliwatan sarang man makakilala sa imo paagi sa imo journal.

Maghatag sing pila ka minutos sa pagrekord sing diutay lang parte sa imo kaugalingon sa imo journal. Sarang ikaw magsulat sang mga espirituhanon nga mga butang, pareho sang kon paano ka nakaangkon sang panaksihon ukon nakalampwas sang mga hangkat upod ang bulig sang Amay nga Langitnon. Sarang

ka man magbulig sa imo kaapuhan sa dapadapa (nga basi magbasa sa imo journal sa pila ka adlaw!) kon daw ano ang adlaw-adlaw mo nga kabuhi. Ano nga mga proyekto ang imo ginahimo sa eskuwelahan? Ano ang hitsura sang imo kuwarto? Ano ang imo paborito nga handurawan sang imo pamilya?

Sa imo pagsugod sa pagsulat sing ginagmay sa tagsa ka adlaw, indi lang nga maathag mo nga makita kon paano ka ginbuligan sang Amay nga Langitnon sa imo adlaw-adlaw nga kabuhi, pareho sang paggiya Niya sa mga pionero, kundi magabilin man ikaw sang isa ka palanublion para sa imo kaugalingon nga kaliwatan.

MGA KABATAAN

Pagsunod sa Halimbawa sang mga Pionero

Si Pangulong Uchtdorf nagpaambit sang pila ka mga pamaagi nga ang mga pionero nagpakita sang pagpalangga sa Amay nga Langitnon. Sarang mo nga sundon ang ila halimbawa. Yari ang pila ka mga ideya agud makasugod ka:

KALUOY

- Maghimo sang isa ka manami nga malip-ot nga sulat ukon pamahawi ang isa nga nagakasubo.
- Buligi ang isa ka kaklase sa iya homework.

BULUHATON

- Magpahamtang sang lalab-uton. Maghimo sang isa ka bagay sa tagsa ka adlaw sini nga bulan nga makbulig sa imo nga malab-ot sang imo lalab-uton.
- Buligi ang imo ginikanan sa pagpreparar sang panyapon.

PAGKAPOSITIBO

- Maghimo sang listahan sang 10 ka malipayon nga mga butang sa imo kabuhi.
- Yuhumi ang kada isa nga imo makita.



Ang Diosnon nga mga Kinaiya ni Jesucristo: Mapinatawaron kag Maluluy-on

Tun-i sing mainampiou ining materyal kag magpangamuyo agud mahibaloan kon ano ang ipaambit. Paano ang paghangop sa kabuhi kag misyon sang Manluluwas makapadugang sang inyo pagtuo sa Iya kag magabugay sa ila nga inyo ginabantayan paagi sa visiting teaching? Para sa dugang nga impormasyon, maglog-on sa reliefsociety.lds.org.

Pagtuo, Pamilya, Bulig

Kabahin ini sang sunod-sunod nga mga Mensahe sa Visiting Teaching nga nagapakita sang mga kinaiya sang Manluluwas.

Ang paghangop nga si Jesucristo nangin mapinatawaron kag maluluy-on sa aton makabulig sa aton nga magpatawad kag magtanyag sang kaluoy sa iban. “Si Jesucristo amo ang aton Ehem- plo,” siling ni Pangulong Thomas S. Monson. “Ang iya kabuhi isa ka palanublion sang gugma. Ang mga masakiton Iya nga gin-ayo; ang mga ginapigos Iya nga ginbuligan; ang mga makasasala Iya nga ginluwas. Sang ulihi ang akig nga mga guban nagkuha sang Iya kabuhi. Wala’y sipayan nabatian gikan sa bukid sang Bagol [Golgota] ang mga tinaga: ‘Amay, patawara sila; kay wala sila makahibalo sang ila ginahimo’—ang pinakamataas nga pagpahayag sa kalibutan sang kaluoy kag gugma.”¹

Kon aton patawaron ang iban sang ila mga paglapas, ang aton Amay nga Langitnon magapatawad man sa aton. Si Jesus nagpangabay sa aton nga “magmaluluy-on kamo, subong nga ang inyo Amay maluluy-on” (Lucas 6:36). “Ang pagpatawad sang *aton* mga sala nagaabot nga may mga kondisyon,” siling ni Pangulong Dieter F. Uchtdorf, Ika-duhang Manuglaygay sa Unang Panguluhan. “Kinahanglan naton nga maghinulsol. . . . Wala bala kita

tanan, sa isa ukon ano man ngation, mapainubuson nga nagpalapit sa lingkuranan sang kaluoy kag nagpakitluoy para sa grasya? Wala bala kita naghandum sa bug-os nga kusog sang aton kalag para sa kaluoy—agud mapatawad sa mga kasaypanan nga aton nahimo kag sa mga sala nga aton ginbuhat? . . . Tuguti ang Pagpasag-uli ni Cristo nga magbag-o kag mag-ayo sang inyo tagipusuon. Magpalanggaanay kami. Magpinatawaray kami sang isa kag isa.”²

Dugang nga Balaan nga mga Kasulatan

Mateo 6:14-15; Lucas 6:36-37;
Alma 34:14-16

Gikan sa Balaan nga mga Kasulatan

“Dapat kita magpatawad subong nga kita ginapatawad,” siling ni Elder Jeffrey R. Holland sang Korum sang Napulo’g Duha ka mga Apostoles.³ Ang sugilanon sang buahaha nga anak nagapakita sang duha ka bahin sang pagpatawad: isa ka anak ang ginpatawad kag ang isa ka anak ginbudlayan nga magpatawad.

Ang manghod nga anak nagkuha sang iya palanublion, madasig ini nga gingasto, kag sang nag-abot ang tag-gutom nagtrabaho sia sa pagpanamog sang baboy. Ang balaan

nga mga kasulatan nagasiling nga “sang maulian sia,” nagpauli sia kag ginhambalan ang iya amay nga indi na sia takos nga mangin iya anak. Apang ginpatawad sia sang iya amay kag nagpahiw sang pinatambok nga tinday para sa isa ka sinalu-salo. Ang magulang nga anak nagpauli gikan sa kaumhan kag naakig. Ginpahanumdum niya ang iya amay nga nag-alagad sia sa iya sa madamo nga tinuig, kag wala gid naglapas sang iya mga kasuguan, apang “wala mo gid ako paghatagi sang tinday nga kanding, agud nga magkasadya ako.” Ang amay nag-sabat, “Anak, ikaw kaupod nakon sa gihapon, kag ang tanan nga akon imo. Dapat kita magkasadya kag magkalipay, kay ining imo utod napatay, kag nabuhi, nadula sia kag nakita” (tan-awa sa Lucas 15:11-32).

MGA TANDA

1. Thomas S. Monson, “Love, the Essence of the Gospel,” *Liahona*, Mayo 2014, 91.
2. Dieter F. Uchtdorf, “The Merciful Obtain Mercy,” *Liahona*, Mayo 2012, 70, 75, 77: pagdagmit sa oriinal.
3. Jeffrey R. Holland, “The Peaceable Things of the Kingdom,” *Ensign*, Nob. 1996, 83.

Binagbinaga Ini

Paano ang pagpatawad makahatag benepisyos sa isa nga nagapatawad?